

դեռ. 1914-ի դեկտեմբերին քիչ մնաց Ռուսահայաստանի մի մասն էլ վրա գնար. էնվէրի գնդերը հասել էին արդէն Սարըզամիշի բարձունքները, և Կովկասի մայրաքաղաքը մատնւել էր խուճապի: Փոխարքան պատրաստուում էր փախչելու դէպի լեռների ա'յն կողմը, և կովկասեան թրքութիւնը ցնծութեան մէջ էր...

Հրաշքը միայն փրկեց Կովկասը թիւրքական ներխուժումից: Ջարդւած Սարըզամիշի տակ՝ էնվէրն իր գայրոյթի բովանդակ թոյնը թափեց թիւրքահայ ժողովրդի գլխին: Հայերի բնաջնջման դաւը վաղուց էր նիւթւած իթթիհատի ուրում: Ատիթ էր հարկաւոր — ահա և առիթը. հայերն էին թիւրքերի պարտութեան պատճառը: Հարկաւոր էր մաքրել ռազմարեմը այդ վնասակար տարրից: Եւ ահա առաջ է քաշուում տեղահանութեան ծրագիրը: Պրուսական ու բելգիական ճակատներում տեղահանութիւն նշանակում էր տնտեսական քայքայում, թիւրքիայում՝ ջարդ ու կոտորած էր: Եւ 1915թ. ապրիլից սկսած, ամիսներ շարունակ, թիւրքերը զբաղւեցին հայերի ծրագրւած բնաջնջումով: Ապրիլ 11-ին զանգւածօրէն ձերբակալւելով՝ դէպի մահ քշւեց Պոլսահայ մտաւորականութիւնը: Ապա՝ դիւղեր ու քաղաքներ դատարկւեցին և աւարի ու աւերի ենթարկւեցին: Մի միլիոնից աւելի ժողովուրդ մորթոտւեց կամ մեռաւ տեղահանութեան ճանապարհին և արարական անապատների աւազներում: Դարերով կուտակւած անհաշիւ հարստութիւն, տնտեսական ու մշակութային թանգազին նիւթեր կորստեան մատնւեցին: Մի ամբողջ քաղաքակիրթ ժողովուրդ խաչ հանւեց ու նահատակւեց վայրագօրէն՝ աշխարհի աչքի առջև — ոչ ոք չըմբոստացաւ ու չմիջամտեց: Եւ ո՞վ կարող էր, ո՞վ սիրտ ու կամք ունէր միջամտելու. երկրագունդը խեղդւում էր արեան մէջ: Մարդկութեան խիղճը քար էր կտրել...

Թիւրքահայկական խնդիրը լուծւում էր թիւրքերի ձեռքով: Թիւրքահայաստան առանց հայերի — այս համապատասխանում էր և ռուսների հաշիւներին: Մինչ թիւրքերը կլանւած էին հայկական տեղահանութիւններով ու ջարդերով, ասդին ռուս զօրավարները կադրիլ էին խաղում թիւրքական ռազմարեմում: Մէկ քայլ առաջ, երկու քայլ յետ—ռուս բանակը անվերջ յառաջխաղացումներ և նահանջներ էր անում, որոնց ընթացքին իսպառ քար ու քանդ եղան և իթթիհատական դահիճներից ազատ մնացած Ալաշկերտն ու Վասպուրականը: Դիտում կա՞ր այդ նահանջների մէջ, թէ՞ նրանք ռազմադիտական անհրաժեշտութիւններ էին — միեւնոյնը չէ՞ հայ ժողովրդի համար: Նա դադթում, տնաքանդ էր լինում և ամէն դադթի հետ կորցնում էր եւ իր տնտեսական ու բարոյական կորովը, եւ մարդկային հաւաքական կերպարանքը:

Թիւրքահայկական նահանգների պարպումից յետոյ հետզհետէ փոխւեց և ռուսների վերաբերումը դէպի հայերը: 1916 թւին այլեւս «հայկական ինքնավարութեան» մասին խօսք չէր լսուում. կամաւորական խմբերը լուծւեցին: Կովկասում իշխում էր մեծ իշխան Նիկոլայ Նիկոլայեւիչը՝ հակահայ քաղաքականութեան ներշնչողներից մէկը: Մտածւում էր գրաււած վայրերը յանձնելու ռուս զաղթականներին: Ծրագրւում էր Ալաշկերտի ու Նփրատեան